

Les freluquets de lais velle


Scherzando.



Les p'tés fre - lu - quets De lais vel - le Aint b'n di tou - pet Vés les bel - les ;

Ais les ai - coch - tant Sain fai - çon, Et yos rai - cœn - tant Des tchain - sons.

Refrain.



Oh ! qu'ais sont bés Aid - mi - rale yos ja - quet - tes ! L'éch - prit qu'ais yos

fât pou fe - male Lais ci - ga - ret - te.

2

Pou pésaie le tems
In p'té po,
Les bell's écoutant
Yos propos,
Faint minn' d'aprouvaie
Yos régeons
Main les faint allaie
Pou tot d'bon.

3

Dinche encoéraidgie
Nos youédgés
S'bottant ais mairtchie,
Dain l'piaité;
D'jasant d'iot airdgent,
Les mâtns!
Et diant qu'ais naidgent
Dain l'butin.

4

Ais faint virayie
Yot bâton,
Léchant mirayie
Yos botons,
Motrant yos craivattes
B'n nouquaie
Et yote tiulatte
B'n r'pésaie.

5

Yos tchétes sont prats
Pou leudgie
C'ment en in coffrat
Yot aimie;
D'lais belle ais se diant
Aimoirotx,
Et vit'yi baiyant
Rendez-vous.

6

Poirainvairt d'se fiaie
En ces chirs,
Ais fa véridaie
Yos bés dirs,
Les prayie d'dainsie
In p'tét cô,
Les léchie paiyie
Yot'écho.

7

Mais s'ais fa dainsie
Ais sôlan;
Tiaïn qu'ais fa paiyie,
Ais rébiant;
Ais n'aint que lais blague
Ces bouebas,
Oui, b'n pu de blague
Que d'touba!